

РУТ ХОТПАНУМ ПАЛТ ЯЛСУМ

Ам омам мойтынг олмет порат руц хотпа ёт потрамим, хотпа те ёмас, юв шалтапи, шагтым лягалы: «Татем ёмас хотпа, шар маньщи хурип».

Ты этпост, этпос овыл хоталанэ порат ам мот хон ман ялсум – Венгриян, тот сав мир ёт хонтхатыглалсум, потырталсум, ты латнгыт номтынг ты ёхтэгыт: «Венгрыт насати татем сымынг хотпат олнэл, шар маньщи хурипат». Ос това хотпат ам ёгум маньщи латнгыл потыртасыт. Ты ур сымтем нас эргинэтэ суйты.

Венгрият Сегед уст олнэ университетт маньщи латнгын Каталин Шипец тав студентыт ханищтыянэ. Ты ятил нэкве ман латнгув торген та вагтэ. Тав студентанэ ёт ам хансум нэпакум «Витсам» венгр латнгын толмащламтэ. Тувыл толмащлым потрыт ёт Будапешт уст олнэ нэ – Каталин Надь рупитас, тав потрыт эрнэ щир, ванэтэ щир щопитасанэ ос минам тал оигпан порат йильпи нэпак таратавес – «Vizcsepp». Нэпак таратым магыс ам Венгриян муйлунгкве ты вовинталвесум. Маттем та муйлысум. Нила хотал Будапешт уст олсум, тит хотал Сегед уст, нас ущлахтын хал ат-та олыс. Надь Каталин аумн программа хансум, мен касынг хотал мот-мот хотпат ёт хонтхатыглалсумен, потрамасмен.

Овыл хоталт аумн культурный центрыт рупитан нэ – Рита Майер ус суссылтас, хотал сыс пумыщ потрыт маттем та хунтласум. Хуньттай венгрыт, маньщит ос хантыт (угор махум) акв ляпат пуссын олмыт, тан олум мананылт ань Башкирия ты олы. Пес порат савсыр мирыт танти халанылт сака хонтласыт. Угор махум ос хонтлан мирыг олыс ос улпыл яныгнув хонын ёхтувесыт, мир титыг уртхатым, лакква минас. Хантыт ос маньщит тыгле, луи ма нупыл лащлакв вантласыт, ос мир яныгнув палэ хонтлым хотал унтнэ ер нупыл минасыт. Ань олнэ маньлин венгрыт 896 тал порат ёхтумыт. Овыл ёхтум хотпат – тьи сат хон танти аян-хум пыганыл ёт. Сартын та мат кельтыт олмыт, тувыл римляныт. Манрыг та мат венгрыт олмыгтасыт? Улпыл та урыл: Венгрия ос Башкирия маг мощ аквхольт сусхатэг, мощ аквхурипаг олэг. Тувыл ос улпыл сав тал хонтлым, сав мат яласым миркве мощ вагтал патыс. Тэпынг, регын мат махум та олмыгтасыт. Йисыт миннэл сыс матеныл матёмас та вуянтаманыл, ты хотал мус тот ты олэгыт. Сотыра арыгтем тал сыс олум хонаныл пуссын номияныл, тананыл янытлан ос номнэ магыс сав памятникыт тусьтымат.

Овыл хоталт – этипалаг – яныг учёный хотпа ёт, Петер Домокош ёт ам хонтхатыглалсум. Ты хотпа ам сака янытлылум, тав нэпаканэ акваг ловиньталганум. Тав ма яныт вае, финно-угор махум литературат урыл тав нэпакыт хансы.

Титыг хоталт сартын мен Каталин Надь ёт этнографический музеин ялсумен. Тот Агнеш Кережи рупиты. Ты нэкве пес йис порат атым маньщи пормасыт менмен суссылтас. Това пормасыт яныг сат атпан тал арыгтем пасныл тув тотым олэгыт, Антал Регули тав атыглалыс. Музеит ос послым хурит ам сунсыгласум, маньщи ос ханты хотпат хуньттай пес порат послыггалымат.

Хоталъят порат писателит атхатыглалнэ колт ам Ласло Л. Шимон – Союз писателит халт секретарий олнэ хум ёт ос Дердь Нановски – Москва уст посолыг олум хум ёт ам хонтхатыглалсум, тувыл этипалаг, ос писатель колт акван атхатыглалнэ вармалы олыс. Тот атпан саввит хотпа олыс, маттем ам та титыглавесум, маттем та потыртасум ос венгр латнгыл амти потранум хунтласум.

Хурмит хотал порат Сечени намыл намаим библиотекат ам олсум. Ам ётум тув учёный нэ Марта Чепреги ялыс, менмен ос учёный нэ – Илдико Ширато библиотека сусылтас. Тувыл Марта Чепреги анулм языкознание институтн вантгастэ, тот рупитан хотпат ёт хонтхатсум. Сака ёмас потрынг, сымынг хотпат. Потыртум, мовиньтым унлахолсув, аквтопыл хуньттай вайхатыглалсув.

Ос этипалаг акв художник ёт хонтхатыглалсум, тав наме Миклош Сыч. Сака мащтыр хумкве. Тав рупитанэ йивныл варианэ, ёргиянэ ман сартыянэ, тамле ёпалыт ам ат ващинтасум. Номсэгум, касынг ёпалы варнэ магыс сав тал эри, сака нётнэг ос мащтырыг тан варим олэгыт.

Нилыт хотал порат Этвеш Лоранд намыл намаим университетт ам олсум, тот рупитан хотпат ёт ос студентыт ёт хонтхатыглалсум. Финно-угор кафедра куцаг хум Ференц Хаваш та этпост тыг, Ханты-Мансийск усн тах ёхты. Университетт студентыт маньщи латнгын Марта Чепреги ханищтавет. Акв студент – Виг Йожер ам ётум маньщи латнгыл потыртас.

Хоталыят порат ам радио колт олсум, тот потранум радиан хасвесыт, ос тувыл туйт-хапыл Сегед усн амттем миначум. Тот вокзалт Каталин Шипец ёт хонтхатсум. Тав сака каркам нэкве. Хоталы ати тав акваг алыгми. Ты кос яныг учёный нэ, ос ты яныг уст такви машинал тортал та ялы, ат хурахлы. Хурум аги тав янмалты, тит агияге яныг, мань агитэн туп нёлолов тал.

Этипалаг ам ос мир ёт хонтхатсум, ос атпантем элумхолас анулм хунтлангкве ёхтыс. Тан сака ман луи ма мир олупсал пумщалахтэгыт. Матыр ати урыл акваг титыглахтэгыт.

Ань ам ювле амти мамн ёхтысум. Номтумт, сымумт хонтхатыглалум хотпанум оньщиянулм. Тот ман тыт оlnэ хотпатын акваг титыглалавев: маныр анулм тот мустыс? Анулм пумыщ олыс мир нупыл сунсунгкве, тот оlnэ хотпат сака сымынг хотпат, танти халанылт юртыныщ олэгыт, сат сыс нэматыр суинг турыл лавим латынг ат хунтамлалсум, тан ос ман хольтув суйталнув потыртэгыт, куньим, мовалалым. Анулм пумыщ олыс колыт нупыл сунсунгкве, тан нила-хурум яныг сат тал пасныл унттымат, нётнэт, хорамыныт, касынг кол музей хольт сусхаты. Ос музейныл ман театраныл ты коньпал нётнувет. Анулм пумыщ олыс студентыт нупыл сунсунгкве, тан сака сэрёр хотпат, сыманыл ханищтахтунгкве воратэгыт, тангхегыт. Сав латынг аквторыг ханищтэгыт ос ты латнгытыл потыртэгыт, тан сав нэпак ловиньтэгыт, ты кос яныг библиотекат оньщегыт ос унлынг улас тананылн ат товылхаты, тан ханхылтапытн унтэгыт, тот та ловиньтэгыт. Анулм пумыщ олыс сунсунгкве хомус махум велосипедыл яласэгыт. Сака сав мир велосипедыл яласы, тан магсыланыл янас лёнгх варим олы. Анулм пумыщ олыс хорамынг луптатыл пумщалахтунгкве, туя пора ты кос, ос тот щар регын туи хоталаквет, ус каныт, ус хулыт хорамынг луптатыл торген та унтталымат (янмалтымат). Сав пумыщ ам тот касаласум, потыртангкве те, потрум ат оигпи. Хоты хотпа тув ялыс те, та хотпа туп ваг. Тув ялнэм элы-палт ам мощ пилсум, хурахласум, ань номсэгум – ам амти рут махманум палт муйлунгкве ялмум. Тананылн пумащипа лавегум.

Светлана Садомина (Динисламова) Ханты-Мансийск